

# YAKOBO

## Kukue Ko Yakobo Lɛwɔni

<sup>1</sup> Mɔ, Yakobo, wɛ ni Onanto ku Bonamute Yesu Kristo eto uyifoyifo nɛ mi Onanto eto betidi ba kenke disensɛ bankpo lɛ kawunsisɛ eto akpa nyamɛ kenke busisɛ.

### *Binyɛ Disuɛyuɛ Lɛ Bulɛ Lɛ Mi Butu.*

<sup>2</sup> Mɔ bayimi, binyɛ disuɛyuɛ lɛ bulɛ kpɛ lete, lete lɛ mi butu. <sup>3</sup> Itsyise biyi biɛnkɛ lɛ bulɛ lɛ mi butu nya mi bofokanɔ dɪtɛ befo buɲyɛ lɛ mu kenyeɛ, nyamfo ebutɛ biofo buɲyɛ kekɛle lɛ bulɛ saa eto kenye. <sup>4</sup> Bitɛ lɛ mi bofo buɲyɛ kekɛle disimɛntɛmɛntɛ, lɛ ekpa mi eyenko bɛ lɛ bɛflo belo kenke, bɛ kulesa saa ensiebofe itɛ mi. <sup>5</sup> Fɛɛ lɛ mi nti eto utsyuɛ ebu dɪmamflo lɛ kobetete ɛsuɛ, ɔɔ Onanto nya wuufi utɛ wɛ, itsyise Onanto eefi asa kɛtɛ utidi saa kafo faa lɛ kafoɛkpɛ ɛsuɛ. <sup>6</sup> Fɛɛ lɛ alɛ ola boto katɔ wɛ lesatsyuɛ, ele bɛ fo wɛ anɔ fɛ wuutɛ fɛ lesa nɛ mɛ, manyaki wɛ. Itsyise utidi wɛ kayakii, uyifo fe lekpo eto utuwa ufiebi laasɔ ketsyi katsyilamako. <sup>7-8</sup> Utidi wɛ nte nko, mi mba eto nsusu lafloma mlɛ mlɛ lɛ lesa nɛ ɔnlɛ buyifo ɛsuɛ, membu nkɛ wofo kulesa utsyiko lɛ Bonamute ɔflo.

<sup>9</sup> Lɛ Onanto abesɛ ɔyimi okombo wɛ ni ofokanɔnyɛ katoɔ, ele bɛ unyɛ disuɛyuɛ. <sup>10</sup> Nko ke ini itɛ otabinyɛ wɛ ni ofokanɔnyɛ nɛ, bɛ lɛ Onanto ɔbokosɛ wɛ kasɔɔ, ele bɛ unyɛ disuɛyuɛ. Itsyise otabinyɛ eto nkɛ

ebubə bofe fe kase efukpokpo laalo lə ofa əsuə kakpo lə kaso. <sup>11</sup> Lə kofe ato kobe kənyə kekleeke, koafa kakpo lə sefa eto esi əsuəə, itə efukpokpo nyamə ayləbe, kaalo kakpo lə kaso nya katsylə. Nko ke ini itə otabinyə tsya wə lookakplatsya lə wə keyifoyifo əsuə kekleeke fə ubə ukpə nɛ.

<sup>12</sup> Onanto ebokpo atsyə nwə ke lékpe utu uńyə kekleeke lə botokabe əsuə nya útəkə bulə nye kabua kamə kato. Itsyise eyə lə nnya əsuə wuunyə kayofoyo ka nkpe, ini bo Onanto luufi utə mba laala wə. <sup>13</sup> Lə utsyuə edufə lə botokabe əsuəə, wanteyi nkə Onanto oflo itsyi. Itsyise kulesa embofo Onanto boto kabe lə uyifo lebua, nya wə tsya emfi lebua kanto kuutsyuə kabe. <sup>14</sup> Bomu utidi eto əsuə eto sinə eto alasa, nnya laawɛ wə kənə wə kakpe lə botokabe əsuə nɛ. <sup>15</sup> Nya lə əsuə eto sinə eto alasa nyamfo alɛ kafoo, kaale lebuayifoyifo. Nya lə lebuayifoyifo nəmə abee, diale ukpe. <sup>16</sup> Mə bayimi, biəntə lə kutsyuə saa lə ɔwɛ mi okpe.

<sup>17</sup> Asa sɛɛ nnya nkpe bo kenke ku ətəsa nnya ləflo kenke boənyəə, etsyi Boanto Onanto wə díyifo kato eto ənyələsa oflo. Nya woamfloma kakpe ketuntu fe kase úyifo kofe ku kofande leeyifo. <sup>18</sup> Onato áyɛ lə wə kosate eto lelabi əsuə, nya úləkə bo eyə lə wə ɔnukualetiki əsuə bə lə budi betutɛ lə wə asayifoyifo kenke nti.

*Ele Bə Bikeyifo Lə Bonamute Eto Ditiki Əsuə.*

<sup>19</sup> Mə bayimi lala, bekloma lə bitəkə ənə nyamfo əsuə. Bəkəse lə bitsyue ato mlə lə

utsyuə lɛ etiki budi, fɛɛ bitsyəsua lə etikididi ku ɔblɔnyɛnyɛ mlə mlə əsuə. <sup>20</sup> Itsyise ɔblɔ əntə utidi leeyifo kasɛɛ ka Onanto laala nkə uyifo. <sup>21</sup> Nyaso biləkə ani bitsyiko lə asinsa saa yifoyifo ku nkpə bua saa eto okle busiə əsuə. Bəbokosə əsuə kasɔ bitə Onanto bə lə befo wə ditiki nə ɔkpe mi lə akɔəsi, nnya ni loofu utə mi lə nkpə nɛ.

<sup>22</sup> Bianwɛ mi əsuə biə bɛlɛ Ditiki Sɛɛ nɛmɛ bɔnɔ ete, bomu bifi ni bekpɛ lə mi eyifosa əsuə. <sup>23-24</sup> Itsyise nwə laanɔ Ditiki Sɛɛ nɛmɛ ete fɛ weenyifo lə ni əsuəə, akate ko utidi wə lənyə wə əsuə lə ahuhɔɛ əsuə kənyə kase unte. Fɛɛ lə kokpa ləkələkə kedu mfo koo, woatasuə kase unte. <sup>25</sup> Fɛɛ nwə leebu disi lə kɔfi ko leflɔ kɔətə utidi ləsiə lə wə əsuə əsuəə, nya woalɛ ola keyifo lə ko əsuə inni bɔnɔ te waanɔ koo, Onanto ebokpo wə atsyɔ lə lesa saa nə weeyifo əsuə.

<sup>26</sup> Lə utsyuə eebu nkə nwə leesumu Onanto uni, fɛ woanlɛ wə odiakami ola lə etikididi əsuəə, ɔwɛ əsuə nya wə kesumu əmbə kutəkə saa. <sup>27</sup> Kesumu ka nyɛ lə kusu əsuə, ka Boanto Onanto lənyə nkə kakpa nya botakebu saa ləmbə lə muu, ni mbo mfo nɛ bə, balɛ bakɔbɛbi ku bakɔbɛsiə ba nɛ kanyi bunyə ola, nya lə balɛ əsuə ola, bələkə əsuə betsyiko lə kawunsiə eto abuayifoyifo əsuə.

## 2

### *Biankpɛ Kabakefe Lə Betidi Nti.*

<sup>1</sup> Mɔ bayimi, fe mba lefo Bonamute Yesu Kristo, wə nwə ni Diyənde eto Onamute bɛnɔɔ, yanle bə bikabe betidi eto ənəmi ku mə

nyenkɔɔ, bikeyifo asa. <sup>2</sup> Boefi boe betidi inuə bətsyuə əbə mi katsyako. Oni eyifo ɔkplenyə wə nti kafia kplɛ ka lefo koya nya onkpe sika sia eto lɛsukpɛ lə lenimi, nya unuəfə wə ni okombo nti lefianku. <sup>3</sup> Békpasə ənəmi bitə ɔkplenyə əmə nya béfo wə ku dibu, bətɛyi wə biənkə, “Nlɛ fə lekprakpa, bə əsiə lə kakplekɔ mfo.” Nya bətɛyi okombo əmə biəkə, “Fəə nyə mmə, nye bəsiə lə kasonti lə mɔ ɔflo mfo.” <sup>4</sup> Lə biyifo nkomə, nyalɛ eni nsusu bua ini bífi béla etiki bíləkə, békpe kabakefe lə betidi nti nɛ?

<sup>5</sup> Bɛnɔ! Mɔ bayimi lala, Onanto ələkə bakombo lə kawunsiə kamfo nkə bafiani lɛwɔnɔ eto bakplenyə lə bofokanɔ əsuə, lə bənyə kedikɔ lə wə sekakedikɔ ka úləkə utsyɛ itə mba laala wə. <sup>6</sup> Fɛɛ mii, biembu bakombo nya biakpe mə kafani. Inni batabinyə bomu laanyinkə mi kakpe kasɔ? Inni mə ləənə mi kesuko akpokakpokɔ? <sup>7</sup> Nya inni bakplenyə bamfo laatɛyi kabua ketsyiko dibu eto diye nə bəfi bətəkə mi se bəfiani Kristo eto bafokanɔfɔ?

<sup>8</sup> Lə biyifo lə Onanto eto sekakedikɔ eto kɔfi komə əsuə tututu, fe kase bawɔni bakpe lə Awɔnisa Kɛnkɛ eto Kukue əsuə bə, “La fə ɔyimitsyuə fe fə əsuə sekaa,” ete eyifo lesa nə diɲyə itə nɛ. <sup>9</sup> Fɛɛ lə biabe betidi eto ənəmi fə bieyifo asaa, nyalɛ biyifo lebua. Nya kɔfi komə tsya lélo mi dikpi fe babuayifo. <sup>10</sup> Utsyuə saa ke léta kɔfi kɔni ubuu, údi dikpi, óta nyamble kenke ubu. <sup>11</sup> Itsyise nwə lékpe kɔfi komə nkə, “Mankpo kusie nye kusə.” Wə ke lɛtɛyi nkə, “Manlo utidi nɛ.” Nyaso lə émendi sɛsɔnɔ fɛ

fálo utidii, ete bε áta kɔfi ebu. <sup>12</sup> Nyaso bitə lə bo etikididi ku bo eyifosa lə iləkə ete bə kɔfi ko dí-tə bófo bunsí lə bo əsuə əsuəə, ko kefi Onanto luufi okponko bo lekpo tsya nε. <sup>13</sup> Itsyi lə lekpokponkpo nəmə əsuəə, Onanto embunyə kamin-sə kuutsyuə saa wə ləənn-yə wə utsyuə kamin-sə. Fεε Onanto embolo dikpi nwə ləənyə wə utsyuə kamin-sə.

*Biyifo Asa Nnya Laate Bə Béfo Bεnɔ.*

<sup>14</sup> Mɔ bayimi, lə mi utsyuə nkə okpe bo-fokanɔ fε wə eyifosa lənləkə nnya kate nkoo, nte kutəkə ko uunyə lə nnya əsuə? Wə bofokanɔ bomfo ebofo wə buləkə? <sup>15</sup> Bifi nnya biə, bayimisaní nye bayimisió bətsyuə kpe ba mfia léla mə lə əsuə nye bəmbə lesa nə looyo mə budi ekemi. <sup>16</sup> Nte kasεε ka nkpe lə nnya lə mi ɔni áteyi mə nkə, “Bisu lə diyuə əsuə, mi əsuə lə iyifo kpankpa, lə bidi bimi,” fε biambεbε asa nnya lefe itə əsuə eto sinə eto nkrəkεkε bitə məə, nte kutəkə ko nkpe lə nnya əsuə? <sup>17</sup> Nyaso lə bofokanɔ mate kpe utsyuə nya keyifo sa dimankɔ lə mu, wə bofokanɔ bomə eyifo bufufu.

<sup>18</sup> Fεε bətsyuə ebətəyi bə, “Utidi ɔni kpe bofokanɔ, nya obamba tsya leeyifo keyifo.” Mɔ mbuaye ni nkə, “Ləkə ate mε kasε utsyuə ləkε bofokanɔ fε weenyifo keyifo sεε. Muuləkə mɔ bofokanɔ nte wə eyε lə keyifo sεε ka meeyifo əsuə.” <sup>19</sup> Afo anɔ fə Onanto ɔni ete nkpe? Nko ini sitinti nε. Fεε kloma fə awɔnɔ bua tsya áfo banɔ nko, nya baate sikpi, ketinkə. <sup>20</sup> Ɔmumu! Ala fə nləkə nte fə bə bofokanɔ bo keyifo sεε saa dímakokoo, eyifo bofokanɔ

fufu? <sup>21</sup> Ntsyæ ibæ fæ bo Ona Abraham díyifo ɔsɛɛ læ Onanto eto ənəmi? Eyæ læ lesa nə úyifo eso nə, itsyise úfi wə ubi Isak úsu útəkə læ kedikətəkə eto leba əsuə bə læ ufi wə utə Onanto kedi. <sup>22</sup> Bənle bunyə? Wə bofokanɔ ku keyifo ləkɔ iyifo lɔni. Nya keyifo ka úyifo ləkɔ nya fæ wə bofokanɔ læflɔ bolo nə. <sup>23</sup> Itə etiki nnya nkpe læ Awɔnisa Kɛnkɛ eto Kukue əsuə əbə itə bə, “Abraham áfo Onanto ɔnɔ, nya læ wə bofokanɔ esoo, Onanto ákpe wə dibu fe utidi wə ni ɔsɛɛ.” Nyaso Onanto dífi wə fe wə ɔyetsyuə nə. <sup>24</sup> Bíunyə mómɔ! Onanto ənnyə utidi eto bofokanɔ mate ete kebu wə bə uyifo ɔsɛɛ, wə keyifoyifoyifo ka laakoko mu eso. Nya inni læ kase ófo ɔnɔ eso ete.

<sup>25</sup> Nko əmə ke eso Onanto léfo útə Rahab, otsyetɔ əmə nə. Wə ku Onanto eto nti əbə ɛlɛkɛ eyæ læ kase ófo Israelfɔ eto batɔnkpe ba laabio kabe asa læ wə diyo, nya ɔwunsəko mə báye kusu bamba bétsyetsyi bédu eso.

<sup>26</sup> Nyaso ekpa wuee be fe kase læ utidi eto əsuə eyifo lesakpenkpe læ læwɔnɔ əmbə læ nii, nko ini læ eyifosa saa mankəkoo, bofokanɔ tsya ekpe.

### 3

#### *Bɛlɛ Mi Odiakami Ola.*

<sup>1</sup> Mɔ bayimi, biəntə læ mi nti eto betidi kpə læ bafiani bateasa. Buyi buə bo mba ni bateasaa, Onanto ebokponko bo lekpo kekleke læ diyi nəmə əsuə eso utsyuə saa. <sup>2</sup> Itsyise bomblɛ kenke aata kebu. Fæ læ utidi utsyuə kpe wə laanta kebu læ lesa nə waatɛyi əsuə nyalɛ utidi

əmfo aflɔ nya waafɔ wə əsuə kenke tsya bɔle kukɔnɔ. <sup>3</sup> Boefi situ kakle ɔtɔmimi eto kenye bə lə utsyue bo koto bə lə bɔyenko wə busuko kaka kee boala. <sup>4</sup> Bibu ɔklɔ kplɛ wə ufiebi kplɛ laafɔ se bukə kayenko lə lekpo əsuə, fɛɛ wə ɔyenkoyi kɛkɛ ete laaka wə kayenko. Nya baaka wə kayenko kesuko kaka kee okanka əmə lela nkə weesuko ko. <sup>5</sup> Nko ke ini odoakami tsya nɛ. Ite bə ɔfɛ tinti lə etidisuə kəmiə tsyaa, wə əsuə utidi laaye kabesə əsuə kato lə eyifosa kplɛ əsuə nɛ. Bebe kase ini bə ute eto odiaakami kɛkɛ te lətə kusəmbia kplɛ ləənyə ute kaato.

<sup>6</sup> Nko seka odiaakami tsya nte fe ute nɛ. Uyifo fe kawunsia ka diyi ku lebuə eto asa nnya nkpe lə bo lə əsuə eto sinə nti. Woanansə əsuə eto uyi əmə kenke nya woatsylɔsə bo nkɔpəsiasia. Fɛɛ wə kosate, ute manlo kosate laato ute kakpe lə wə nya woanyə lə bo əsuə flafɛfla. <sup>7</sup> Utidi áfo bebutubuki buyuəsə, nya wəətsyɛ mba tsya nkpe sisenle ku baklɔbɛ ku mba laakpii kasɔ ku akpe ku abamba kenke. <sup>8</sup> Fɛɛ kuutsyue saa mámfo tɔ odiaakami eto nkɔpə buyuəsə. Uyifo obuəle wə bembofo binyinkə kakpe, wə diyi ku keni ka laalo utidi fe owa eto keni. <sup>9</sup> Boefi wə katesə Bonamute ku Boanto Onanto. Boefi wə kekudi bo bayimitsyue, utidi wə beyifo lə Onanto eto ditsyabi əsuə. <sup>10</sup> Aninsɔtiki ku ekuditikii, nyamble aabɔ ketsyi lə kenye kamə ke əsuə. Mɔ bayimi, yanle bə nyamfo tsyɛ nko nkɔpə. <sup>11</sup> Ditubiə kuditsyue aanyifə ntu bo nkpe kamini kesi kaayifə mbo nkpe mba. <sup>12</sup> Mɔ bayimi, kototsyabi ebofo

lɛbɛsi bɔnwɔ? Nye aketekubi eto ukue nwo kototsyabi eto awɔnsa? Nko ke ditubiɛ nɛ laayifɛ mbantu lɛmbofo ntu bo nkpe kamini bɔyifɛ tsya nɛ.

*Onanto Eto Kobe Ɛtɛ Utidi Aabokosɛ Ɛsuɛ Kasɔ.*

<sup>13</sup> Owoe ni obesibe ku nwɛ laanɔ asa kasɔ lɛ mi nti? Ufi nkɔsiɛsɛ sɛɛ ulɛkɛ nyamfo ote lɛ wɛ eyifosa ɛsuɛ, nya uyifo nnya ku ɛsuɛ kasɔ bokosɛbokosɛ ku lɛ kobe ɛsuɛ. <sup>14</sup> Fɛɛ lɛ mi ketu kɛmiɛ biasɛsɛ ɛnɛmi lɛ asa ɛsuɛ, lefonyi nkpe mi, nya mi nti eto utsyuɛ saa laabɛbɛ wɛ mate eto lɛlɛkɛsɛ, biantɛyi sidia bela ɔnukualɛ kɛnyɛ, bifi mi bebesɛ ɛsuɛ kato biɛ biyi kobe. <sup>15</sup> Kobe komfo eto okle mentsyi kato, bomu kawunsiɛ mfo eto kole kuni, kunni nko nye lɛ lɛwɔnɔ sɛɛ ɛsuɛ bomu nko nye lɛ lɛwɔnɔ bua ɛsuɛ. <sup>16</sup> Itsyise kaka kutsyuɛsɛ kɔnkpɔ ku mɔ hã eto ale lɛ ɛlɛkɛ nkpeɛ, kɛnɛ ku asa buayifoyifo saa eto okle hã laakɛ mfo. <sup>17</sup> Fɛɛ tutɛɛ, kobe ko ditsyi kato akpa, kuyi ku diyuɛ, disuɛtsyuɛ ku sɛyɛmitsyuɛ kasɔnɔnɔ, kuyi ku kaminsɛnyɛnyɛ, nya koawɔ ebibi sɛɛ. Koannla ntisensense lɛ betidi ɛsuɛ, nya bɛtsyuɛ mamfokanɔ ku kawɛ saa anɛ lenti. <sup>18</sup> Betidi ba laakpla bɛtsyuɛ nti, kɛnɛ diyuɛ kaboko lɛ betidi ntii, aato eyibibi nnya eto awɔnsa ni nkpe sɛɛ siɛsiɛ.

## 4

*Ele Bɛ Bebokosɛ Ɛsuɛ Kasɔ Bitɛ Bonamute.*

<sup>1</sup> Be lɛnɛ amakɔnkpɔ ku niɛ kakpe mi lenti? Yeetsyi lɛ mi kɛnɛnsɛ lɛ nkɔɛdidi



eto alasa nnya nle mi bokponko le kemio lefe saa esue. <sup>2</sup> Biabebe kawunsio eto bika, fee biambofo mi boka. Nyaso bialo betsyue. Biabebe asa keklege, fee biamfo nnya bunyo, nyaso biadio nie kakpo betsyue. Bianke lesa ne biabebe, itsyise bianto Onanto bie uti mi nnya. <sup>3</sup> Nya le beto Onanto asa tsyaa, biamfo nnya, itsyise bianto nnya ku nsusu see, biato asa keti mi esue mate. Asa nnya biufi bekepe esue disuoyue ha biato. <sup>4</sup> Biyifo betidi ba lendi onukuale! Binyi bie mba difi me esue beyifo seyetsyue ku kawunsio kamfo eto nkpedidi eyifo Onanto eto balo? Nyaso fe ke lela fanki elaki kawunsio kamfo seyetsyue, efi fe esue eyifo Onanto eto olo. <sup>5</sup> Biambu bianke onukuale ambale Anantotiki nnya letyini ne, "Lewono ne Onanto difi okpe le boo, eyifo lewono ne laakpo sitsyuese keklege le bo disi." <sup>6</sup> Fee Onanto eto lefoni ne weti boo, kepe ale lesi kulaa. Fe kase Awonisa Kenke nyame letyini ne, "Onanto aanyale le mba laabese esue kati esue, fee weti we lefoni mba laabokose esue kati."

<sup>7</sup> Le nyasoo, bebokose esue kati biti Onanto. Biyale le Obonsam le esue, ete wuutsyetsyini udu le mi ofo. <sup>8</sup> Beyi befi Onanto, ete wuutsya ebayi ofi mi. Bifle mi ani, mi mba ni babuayifo. Bifle abua bilaki le mi akasi, mi mba eto nsusu laafloma le bofokano esue! <sup>9</sup> Binye kanyi le mi akasi, befa bembembe, biwu keku. Befloma mi simememe le sefiani nkuwuiwui, le mi disuoyue le diyifo kpomini. <sup>10</sup> Bebokose esue kati biti Bonamute ame, ete woobese mi kati.

<sup>11</sup> Mɔ bayimi, biendi ditiki nə dińyə itə lə mi bətsyuə əsuə. Nwə laatəyi wə ɔyimitsyuə ditiki nə dimatsyɛ nye ditiki fimfi, nye laakpoko wə ɔyimitsyuə lekpo, aatəyi ditiki nə dimanləkɛ ińyə lə kɔfi əsuə, nya waakponko kɔfi komə lekpo. Lə kɔfi komə faakponko lekpo, nyalɛ əmənɔyifo nwə leeyifo lə kɔfi əsuə, bomu ko okponkpo feni. <sup>12</sup> Onanto hã ni nwə laakpe afi nya uni okponkpo tsya. Wə hã lofo bofo kətə utidi nye ɔtsylɔsə wə tsya. Owɔe feebu fə wə feni fɛ faakponko fuutsyuə lekpo?

*Mambesə Əsuə Kato.*

<sup>13</sup> Mɔmɔɔ, bitsyue koto bɛnɔ, mimba laatəyi biəkə, “Mmi nye kusɛɛ, buusu kusu umə nkplɛ utsyuə nya budi fe lɛlɛ lɔni mfó, buuyifo nyifo bɔkɛ atabi kpenkpe.” <sup>14</sup> Biyi lesa nə luubə kusɛɛ? Mi nkprə te fe kuyuə ko laabɔ itə lefe kliminti, kesinkli kanya. <sup>15</sup> Lesa nə ele bə bɛtəyi ni bənkə, “Lɛ Bonamute atɔnɔ bonkpe nkprə, buyifo nəmfo nye nəmə.” <sup>16</sup> Fɛ mɔmɔɔ, biaka kase kabesə əsuə kato. Əsuə kato bobesə bomfo kenke manləkɛ.

<sup>17</sup> Lə nya esoo, nwə ke nyi lɛsɛ ele bə uyifo fe ɔni weenyifo nii, aata kebu keyifo lebuə.

## 5

*Atokəkə Itə Batabinyə.*

<sup>1</sup> Nya mɔmɔɔ, mi batabinyə bɛnɔ! Biwi nku bɛsɔ ani kenye lə bulə kplɛ bo ləəbə mi butu əsuə. <sup>2</sup> Mi betabikə ábia nya balɛ dídi mi awu ku mfia bábiasə kenke. <sup>3</sup> Mi sika sia ku sika flubia áto nkanda nya nyamfo luudi sedansie ińyə lə mi əsuə nya yotonsə mi əsuə

eto sinə fe ute seka. Bəbɛbɛ bikə biɲyənɓə léto lə eyi fɛfɛ nyamfo. <sup>4</sup> Bebee! Beyifoyifo ba díyifo keyifo bətə mi lə kakueɛ, beni bíamfo mə nyo. Bidi kaa benɔ kase banlɛ mminsəku buwui bembembe! Nya mba dífəsə bɛkuenkɛ bətə mi fɛ beni bíamfo mə nyo eto kudu díkayo Boanto Onanto Ɔkplɛnyə əmə eto kotoo. <sup>5</sup> Mi nkprə bo binsi lə kasɔ mfo eyi ku nkprədidi ku disuəyuənyənyə sɔɔ. Nya bíyifo mi əsuə bísíə ayinkua itə diyi nəmə itə bolo. <sup>6</sup> Bélo betidi ba dímanta mi bebu dikpi, nya bélo mə lə lefe nə bántaka bənyə mi lə əsuə kulaa tsya.

*Bekpe Utu Buɛɛ, Biɲyə Bisəkə Bonamute Əmə Eto Bubə Bio.*

<sup>7</sup> Nyaso, mə bayimi, bifi disuətsyə lə bekpe utu buɛɛ biɲyə isu ese lefe nə Bonamute əmə luubə bio. Bebe kase ɔkuɛmfo nkpe disuətsyə! Bebe kase woənyə buɛɛ kəsəkə bɛkuenkə kpenkpe bia wəəbə bunyə ketsyiko lə wə kasɔ, nya wəənyə buɛɛ kəsəkə ɔsomi eto bɔni lə lefe sɛɛ əsuə. <sup>8</sup> Nko ele bə mi tsya muə utu bɛɛ nɛ. Biəntə lə ani elo mi, itsyise Bonamute əmə eto dibəfe bio eboyo elo.

<sup>9</sup> Mə bayimi, biəndiə niə lə bətsyuə, bə lə Onanto lə ɔyɛ mi lekpo bokponko. Itsyise okponkpo əmə eto bubɛ bɔfi. <sup>10</sup> Mə bayimi, bekloma Onanto eto bənyɛləkətidi ba lébe ditiki nə mə letsya lə Bonamute əmə eti diye əsuə. Bitə lə bobɛ kase bənyə kanyi nya bəmuə utu balɛɛ, lə bokase asa lə nnya əsuə. <sup>11</sup> Boakpo betidi bamba boə mba bakpo atsyɔ, itsyise bənyə bembɛ lə kanyi əsuə. Biɔnɔ kase

Hiob dímuə utu ɔlɛ ku kase Onanto léfo wə nnya layo lə kalosəkɔ. Itsyise Bonamute kpe kafoekpe nya woənyə utidi kaminšə.

<sup>12</sup> Mɔ bayimi, ditiki kekleke nə mɔɔtɛyi mi ni bənkə biankpadi asa, kato keni o-o, kasɔ keni o-o, nye lesa bamba saa dini o-o, biankpadi. Lə ditiki nəmə kpee, bɛtɛyi biə ee. Nya lə dimbəə, bɛtɛyi biə oowo, lə Onanto lə ɔyɛ mi dikpi bolo.

<sup>13</sup> Lə utsyuə kpe lə bulə əsuə nye ɔnlɛ kanyi bunyə lə mi ntii, oto ola utə Onanto. Lə utsyuə lə disuəyuə bunyəə, usə atəsə eto əsə. <sup>14</sup> Lə mi nti eto utsyuə lə bufii, bekpadi bafokanɔfɔ eto ditsyukpa eto beninə lə bato ola lə wə disi, lə bediki wə nuəbi lə Bonamute eto diye əsuə.

<sup>15</sup> Ola wə báto lə bofokanɔ əsuə əbotsya ufunfi əmə, nya Bonamute lootakase wə, nya lufi wə abua ɔtsyɛ wə. <sup>16</sup> Nyaso biləkə mi abua kasɔ bitə bətsyuə lə beto ola lə mi bətsyuə eto disi lə binyə bufitsyantɛya. Utidi sɛɛ eto olatoto kpe əsuəale nya weeyifo keyifo tinti. <sup>17</sup> Elia éyifo utidi fe kase bo tsya ni. Se óto ala kekleke nkə ɔsɔmi yɛ bɔnii, ɔyɛ bɔni lə alɛ ətsyɛ ku kutsyɛ əsuə sɔɔ. <sup>18</sup> Lə nnya kamaa, usi óto ola, nya Onanto díte ɔsɔmi leni nya bidikə lɛlɛkɛ lə kasɔ kamə.

<sup>19</sup> Mɔ bayimi, lə utsyuə əbə kama lə ɔnukualetiki nəməə, bekplatsya lə beekpa wə beboko, <sup>20</sup> bekloma biə utsyuə saa ke lookpa obuayifo utsyiko lə kabuayifoyifo əsuə obokoo, wuutə obuayifo əmə nyə nkpe ku abua kpe nnya úyifo eto bufukatsyɛ.

**Onanto eto kakle fofɔ; Sɛkpɛle  
Sekpele: Onanto eto kakle fofɔ; Sɛkpɛle New  
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Sep 2022 from source  
files dated 13 Jul 2022

5fc03d2a-3cf8-5607-a6e0-9e1e197140bd